

赤城集

赤

城^{十三}

集

函

第 四 十 三 冊

赤城集卷之十三

延慶院免科折記

陳耆卿

戲龍山在靈江西十里有澄潭其旁鉅木槎牙拏雲擁日上人謂龍挂其末蜿蜒若戲狀故號戲龍然其潔且嚴不可褻近慢者斧斤及木溪輒改流其靈怪若此而能赴誠如響吐慈若勿往往奠葷未墜傾盆以集大略見宋進士夏文莊碑然則其靈恠宜若此哉雖然龍固靈物也必有人之靈而後可語龍之靈靈雖有殊而靈於爲民則一爾延慶院址山下職潭事供郡邑凡禱之百須其厘與勞得非欲佐人之靈以致龍之靈者哉

然則非爲民而然哉先是香積法安以龍故得免科折
此院獨否太守邢俊近曰不可使我有二三於釋氏迺
亟免焉然則侯爲誰亦爲民爾夫能龍以捐薄少之賦
纖損也依龍以治衆多之命鉅益也故他寺觀不得免
惟三刹得免焉豈私之蓋公之爾嗟夫世謂經流不耕
而食徒蠹民甚不知其徒逐上下佐人之靈以致龍之
靈也使旱魃逝而雨師降也豐年而多黍多稌也是雖
不耕而食能使吾民耕而食也果蠹民乎哉子規蓋主
僧宿練精勇喜院之沐優假而欲以著不忘也刊州移
於右而請予爲之辭

州治浚河記

姜容

嘉定甲申台有浚河之役是役也自慶歷一見乾道再見今方三見也台城山阻江蹙鱗集數萬家迫隘湫鬱於其間爲河以導溝澮使人脫沮洳宅亢爽風氣宣洩疾癘不生蓋非一日矣按舊志河舊通舟注之江唐許渾陪鄭使君汎舟詩可覆也後淤塞舟不能通值潮溢輒逆城於是慶歷丙戌守元章簡公絳始鑿復其舊而是役一見焉久之注江之衝堙爲平陸則自發源北山越郡治平橋至括蒼門滙而之東遂分道爲斗門以出河非其舊舟不復通矣而闕塞又甚於是乾道己丑守

向侯洵悉力浚治之而是役再見焉河之舊雖難復而
闕塞者沛如矣未幾癸巳火河蔽於瓦礫以迄於今非
惟闕塞而貧侵富蝕上廬旁塹河幾廢矣雨俄頃濁潦
沒道甚或破扉齧屋春夏溼蒸疾癘以滋於是今守王
侯挺慮之而是役三見焉始季秋迄仲冬命戶曹惠孔
時總其要諭民治溝溜使各達於河僦夫具畚缶使輦
河之淤土續斷潢引別派深廣各倍於初因民所利不
擾而辦河以丈計總千五百六十有八而內歸民之侵
蝕者什三夫以工計總萬三千九百有一而內參以壯
城者什二錢以貫計米以碩計總千五百七十有奇而

外饋勞之費什一河之舊雖已難復而平瀾衍流環映
庭戶易沮洳爲亢爽無雨潦疾癘之憂晏然如已王時
矣嗟乎郭內之河民之同便者也通舟注江尤便者也
尤便者旣以難復而併與同便者幾廢由慶歷而下百
八十年而是役始三見時耶人耶余求其故昔之通舟
注江城衰而民稀也慶歷復舊城與民未改也至乾道
城旣縮入而居民多故復之難今愈多故愈難愈難故
其尤便者幾廢俗無長慮視河滋不急遂使同便者又
幾廢侯能深念獨決遠慕元公之志近追向侯之蹟幾
廢者得不廢焉然則天下事亦係諸其人而已耳百八

十年而能浚河者纔三人今而後其獨無人乎夫河不
必幾廢而後治人豈必百年而後逢也河自是可無廢
則邦人感侯德與河爲無窮

修東湖記

王廉清

天台爲郡負山帶江地形嶮巖草木翳薈人烟繁夥萬
室鱗比隨山高下無平川大陸以達水怒每陰雨霖霖
則水泉渫薄澗輪壑委犇流疾走自高而下如建瓴於
高屋之上閭里之民咸懷決溢之懼厥初經營智者相
攸鑿湖於城東當衆山縈匯之要以受百水卽城徑庭
爲瀆以疏之湖高而江低並湖爲斗門泄水以注之江

旱則瀦畜以待灌溉之須民用莫居無復水患歲月既久畔援施易土石傾圯啓塞無時蓋自皇祐熙寧以迄於今屢作屢廢至是極矣每大風雨至闐闐震有蕩沃之虞水無所歸不循其流理則然也乾道五年冬秘閣河內向公以淮南連帥移守是邦始是見民吏具宣天子德意問民所疾苦舊聞此湖堙廢弗除卽躬至其所環眎利病攷卜協日興工庀役公以浙東路兵馬都監開封俞紳才幹有餘敏於集事卽檄以董之臨海令會稽陳居安方以民功薦聞興利除菑實惟其職公乃覈舊跡披故道昔之沮礫鬱積者今疏鑿之昔之侵漁蔽

屬者今疆理之浚城中之水溝剏城闔之斗門覆以亭
屋以引左右之水以達懷義橋之南北又卽湖東故城
之地舊斗門築三閘以通西江總爲斗門者六爲亭者
一北湖其南方東西十六丈五尺其北方東西六十五
丈五尺南北通袤三百二十丈計其廣輪二百十三畝
有奇其深七尺興工於六年二月之丙戌而訖於三月
之壬戌凡用工八千九百有奇長隄崇崇清波綿綿夏
屋渠渠坊址暨暨不勞於民不擾於市宏壯深廣煥然
一新烏虜偉哉厥功告成郡僚邦人咸願刻石紀績屬
僕以文乃爲之記曰惟昔水利備於周官溝洫澮川遂

人掌之蓄水止水均水舍水寫水詳於稻人在漢召信
臣杜詩號爲循吏之冠其功始於鑿六石門晉杜元凱
儒者之宗請二千石修理堰谷以積其水原其用心豈
專爲耕耨浸灌之計哉惟公夙以風力知略爲世吏師
凡所臨郡國興滯補弊壞奸隸之機埽險健之訟施惠
於斯民以廣我國家之盛德是役也披秦川荒窮源探
本發明前人久廢之績推尋百里堙汨之弊啓作竣事
必躬必親無一弗盡以爲邦人永永無窮之利用心亦
可謂閎矣公今行且歸闕左右帝旁推此心以利天下
顧豈久留於郡哉凡此父兄戴公之賜自今謹儲泄之

節相曠潦之宜疏導以時淳淳無壅甘棠峴首之思俾
永勿壞尚千百年公之惠澤其有既乎

黃巖浚河記

王居安

古人治田必先治水水有常利故田有常豐禹曰浚畎
澮距川孔子曰禹盡力乎溝洫凡此皆治水以治田也
周人治野之法夫間有遂以達溝由溝而洫由洫而澮
以達於萬夫之川自廣尺深尺而爲畎倍爲遂又倍之
而爲溝爲洫至於澮則廣二尋深二仞是畎澮之間治
水有常制也甸方八里以出田稅旁加一里以治洫積
而至於四縣爲都方八十里以出田稅旁加十里以治

澮是百里之間治水有常人也若是則水烏得而不利
田烏得而不豐今居田者唯恐其不廣不暇爲溝洫之
地取民者惟恐其不多不復弛溝洫之稅是宜與古異
也黃巖爲邑爲田可百萬畝而水鄉之田實居其半其
地負山瀕海山多則溪流易漲海近則水澤易洩言水
利者有浚河置閘二事而已而二事又復不密昔之爲
閘者慮未及河也紹興以前初未有閘大率爲埭以堰
水頗爲高田之利而下田病之水潦大至下鄉之民十
百爲羣挾挺持刃以破埭遂有鬪爭殺傷之事鄉人於
是始議建閘酌高下以謹啓閉解仇怨以全鄉井此意

美矣然諸閘旣立開時常少閉時常多潮水一石其泥
數斗朝夕淤塞寢成平陸方時巨浸閘雖啓而流實壅
於是下田之被害反咎夫閘曾不若埭之可以破決洩
水之易且速也東嘉蔡君範來宰吾邑深究水利之源
初年遂決閘外之港使水有所洩明年遂開田間之河
使水有所瀦不特河爲有功而閘亦有利矣是役也君
實啓之常平使者齊公碩爲請於朝役不逾時厥功告
成君適被命通守四明屬予以記予方守東嘉尋又有
帥閩之役未暇也君移書速予記曰苟無記後之人且
因循弗圖民復病矣予謂今之爲令者以三年爲任其

始至也一邑之事未必盡知及其知之也簿書詞訟委積紛還又力所不給大抵趣辦目前數日以待去者既爾來者亦然民瘼之不暇卹率由此也倘來者念淤塞之易而常加疏導之功知開浚之難而常加葺治之念則君之利吾邑者雖千祀猶一日也君尚書文懿公季子賢而有文克世其家邑治故有河經闡闡以環公廨歲久湮爲民居君盡復之而民不怨皆可書也予因序河間之本末俾後之爲邑者庶有考於斯文

新建中津橋碑

唐仲友

郡介括蒼天台間水源二山東南流合於城西十五里

東注於海城臨三津其中最要道出黃巖引甌閩往來
晝夜不絕招舟待濟寒暑尤病颶風無時歸師牟利弊
船重載命寄毫髮仲友以淳熙庚子來守辛丑三月常
平使者循行迂於城南戊夜登舟篙工失度比曉乃汔
濟因問父老江可橋才作何故對以潮汐升降經營爲
難食於津與瀕江之市又沮之皆中輟仲友自念承乏
牧養繼歉歲入境人草食賴朝廷勤卹牟麥告登病少
瘳矣橋大利可毋作適分官吏庀工徒度高下量廣深
立程度以寸擬丈創木樣置水池中節水以筭効潮進退
觀者開諭然後賦役始於四月丙辰成於九月乙亥築

兩堤於皇華亭之東甃以巨石貫以堅木載護以菑楫
中爲級道兩旁爲却月形三其層以綱水勢南堤上流
爲夾木岸以受水衝堤間百十有五尋爲橋二十有五
節旁翼以欄載以五十舟舟置一碇橋不及岸十五尋
爲六棧維以柱二十固以槌筏隨潮與橋舛低卽續以
版四鍛鐵爲四鎖以固橋紐竹爲纜凡四十有二其四
以維舟其八以挾橋其四以爲水備其二十有六以繫
筏繫鎖以石圉四繫纜以石獅子十有一石浮圖二纜
當道者植木爲架遷飛仙亭於南舛遷州之廢亭於北
舛以爲龍王神之祠爲僧舍及守橋巡邏之室三十有

一間南僧舍爲僧伽之室凡橋欄舟楫之役五邑共之黃巖預竹纜之須餘皆屬臨海金木土石之工二萬二千七百用州錢九百八十萬米四百八十斛酒二百六十石橋旣成因其地名之曰中津第賞官吏有差燕犒以落之命臨海尉支鹽官主橋事兩指使同視啓閉擇報恩寺僧行各二人奉香火置吏屬行文書番將校主巡警邏者二人守橋十有四人皆厚其廩給又以度數名物爲圖書禁防法守爲要策田畝財用爲版籍東湖歲輸公帑數百緡改入焉以備葺費命臨海黃巖令董葺事所以爲橋計者粗備矣夫民可與樂成難與慮始